

等罷職未久高琬等奪告身亦不久事變未出之時徑為收叙未便此人等聚于京中有所事變則或付軍職而送之可也今不可收叙也○彗星見於太微東垣外在角宿初度去北極六十五度尾指西南長三尺餘光芒射及東垣第五星色白黑氣一道自巽方至坤方布天良久而滅開城府南部井中如牛吼六七度而止井邊大石良久搖動

已丑彗星見於周鼎星上在角宿三度去北極五十八度尾指西南長三尺五寸許焰及諸侯星上第一星色白流星出南河星入北極星下大如鉢尾長七八尺許色白流星出北斗第二星入紫微東垣第一星狀如梨尾長一二尺許色白北方如火氣慶尚道陝川日暈兩傍復有二日並生日色或黃或黑良久乃滅

二月庚寅朔夜一更彗星見於寅地自二更至五更彗星見於招搖星上在元宿初度去北極四十四度尾指西南長四尺許色白巽方南坤方如火氣流星出尾星入南方天際狀如拳